

## NAQQIUT

**Kalaallit Nunaanni eqqartuussisarnermut inatsisip allangortinneqarnera pillugu Kalaallit Nunaanni inatsisip atuutsinneqalernissaanut Namminersorlutik Oqartussat oqaaseqaataat pillugu Inatsisartut aalajangiiffigisassaattut siunnersuut (Eqqartuussiviit il.il. suliniuteqarfigineqarnerulernissaat)**

(Ilaqutariinnermut, Inatsisinillu Atuutitsinermut Naalakkersuisoq)

**Saqqummiussissut**

(Ilaqutariinnermut, Inatsisinillu Atuutitsinermut Naalakkersuisoq)

**Siullermeerneqarnera**

Naalakkersuisut sinnerlugit nuannaarutigaaara inatsisisatut allanguutissatut siunnersuutitta innuttaasut isumannaatsumik inatsisitigut ingerlatsivigineqarnissaanut aqutissiuussisussaq saqqummiussinnaagakku.

Naalakkersuisut Kalaallit Nunaanni eqqartuussisarnermik inatsisip allangortinneqarnissaa pillugu Justitsministereqarfimmit inatsisissatut siunnersuummik tigusaqarput (najukkani eqqartuussiviit il.il. suliniuteqarfigineqarnerulernissaat pillugit).

Naalakkersuisut piffissami sivitsulersumi najukkani eqqartuussiviit suliassaasa amerligaluttuinnarnerat ernumassutigisimavaat. Naalakkersuisut periarfissaqarnerit tamaasa ajornartorsiut pillugu danskit Naalakkersuisuinut saaffiginnissuteqartarsimapput.

Saaffiginnissutigisartakkavut tunngavigalugit danskit Naalakkersuisuisa Kalaallit Nunaanni eqqartuussisarnermik inatsisip allangortinneqarnissaa pillugu inatsisissatut siunnersuummik suliaraqput, taamaallilluni nunatsinni najukkani eqqartuussivinni suliassat qaleriaatiinnalersut ikilisarnissaat anguniarlugu annertusisamik iliuseqarfigineqalissallutik. Tamatuma kingunerissavaa Kalaallit Nunaanni innuttaasut inatsisitigut sullinneqarnerisa pitsanngorsaavigineqarnerat.

Naalakkersuisut ajuusaarutigaarput suliassat amerligaluttuinnartut amerlassuserpiaat qassiunersut paatsuungassutigineqarsimmata. Suliassap ingerlannerani piffinni eqqartuussivinniittuni suliassat amerligaluttuinnartut kisitsisitali assigiinngitsut marluk ilisimatitsissutigineqarsimapput. Naalakkersuisulli siunnersuutigineqartut immikkuualuttortai tapersertorpaat. Naalakkersuisut justitsministeriaqarfik isumaqatigaat suliassat katersuuttut piffinni eqqartuussiveqarfinni arlatitsigut ikiorsiivigalugit soorlu atorfinitsitsigallartarnikkut ikilisarneqassasut.

Inatsisissatut allanguutissatut siunnersuummi siunertarinearpoq Kalaallit Nunaanni eqqartuussisarnermi inatsit arlalitsigut allanguiffigineqassasoq, taamaaliornikkut Kalallit Nunaanni piffinni eqqartuussivinni suliassat qaleriaatiinnalersut siunissaq ungasinnerusoq eqqarsaatigalugu piffissap naammaginartup iluani, pisariaqarneralu tunngavigalugu pitsaassuseqarlutik suliarineqartarnissaat.

Allannguutissatut siunnersuutigineqartut pingaarnersiorlugit makkuupput

1. Kalaallit Nunaanni Eqqartuussivik pinngitsoorani saqitsaannernut tunngasunik suliaqartussaatinneqassasoq, ilaqutariinnermut inatsisinut tunngasut, ataataassarsiuinermik suliat pigisanillu agguaassinermik suliat ilanngunnagit
2. najukkami eqqartuussisunik ivertitsigallarsinnaanerit periarfissatut annertusinerat, danskit eqqartuussiviineersut inatsisilerituut ivertikkallartarnerisigut atuineq periarfissatut ilanngullugu, aamma
3. eqqartuussisutut ikiortinik atuinnissamut annertusaanerit.

Inatsisissatut allannguuteqarfiniakkatta qulakkiissavaa kalaallit inuiaqatigiit inatsisitigut illersorneqarnerat. Naalakkersuisunut pingaaruteqarpoq inuiaqatigiinni inatsisitigut isumannaatsumik pitsanngorsagaasumillu ingerlatsinerup eqqumaffigineqarnissaa. Tamannalu suliaavoq pingaartinneqarluni ingerlanneqartoq. Inuiaqatigiit sutigut tamatigut ineriartorfiusut inatsisitigut aqqissuussaanerup malinnaanissaa pingaaruteqarpoq. Inatsisissamut allannguutissatut siunnersuuteqarneq aqputigalugu suliniutit taakku piviusunngortinneqassapput. Eqqunngitsumik pineqarsimagaanni pingaaruteqarpoq innuttaasup eqqartuussisunut saaffiginnissuteqarsinnaanera tamannalu tunngavigalugu pitsaasumik sukkasuumillu sullinneqarsinnaanera. Taamaaliornikkut inuiaqatigiittut inuuffigisatta ataqqineqarlunilu uppersassuseqarnera pigiinnarneqassammat. Tassuunakkullu uagutsinnut kissaatiginartuuvoq inatsisit atuuttut tunngavigalugit sukkasuumik suleriuseqarnissaq.

Ilanngullugu takoqqussavara Namminersorneq pillugu inatsimmi § 17 naapertorlugu danskit Naalakkersuisuisa inatsisissatut siunnersuutaat Kalaallit Nunaannut attuumassuteqartut, Folketingimut saqqummiunneqartinnagit, Kalaallit Nunaanni Namminersorlutik Oqartussanut oqaaseqarfigisassanngorlugit nassiunneqartartussaammata. Umannga aalajangiiffigisassatut siunnersuummut oqaaseqaateqarnissarput pineqarpoq. Una siunnersuut upernaap manna sammissagippat Folketingemut nalunaarutigineqareerpoq tassani sammineqarneqarnissaanut angumersiniassagatta. Allannguutissatut siunnersuuterput Inatsisartunit tapersorsorneqanngippat Justitsministeriaqarfiup siunnersuut Folketingimi oqaluuserisassaniit piissavaa.

Naalakkersuisuttaaq nunatsinniit Folketingimut ilaasortaatsinnut qujarusupput suliat innuttaasunut pingaaruteqaqisut pillugit suleqatigilluarsimammatigut.

Taamatut oqaaseqarlunga immikkoortoq Inatsisartunut oqaluuserisassanngortippara.